

Tayta Diosman yarakur imano kawashqantsipis

Wakin runakuna Tayta Diosman yarakuykashqanta nirpis manami musyapäkuntsu Diosman yarakuq runa imano kawananaq kashqantapis. Tsayta yachakunantsipaq Tayta Diosman yarakuq runata ruédaman tinkutsishun.

Chawpin: Jesucristuta chaskikushun

Tayta Diosman yarakuq runaqa Jesucristutami chaskikun.

Ruëda chawpincho cübu y ëji mana kaptin manami tumayta kamäpakuntsu. Tsaynölami Jesucristuta mana chaskikurqa Tayta Diosman yarakuyta mana kamäpakuntsitsu. Payta chaskikurmi itsanqa payman yarakunantsipaq mushuq kawayta chaskintsi.

2 Corintios 5.17

Pipis Jesucristucho karqa mushuq kamashqa runanami kaykan. Unay kawayqa pasashqanami. Kananqa lapanpis mushuqnam kaykan.

Gálatas 2.20

Noqaqa Jesucristuwan cruzcho wanushqanömi kaykä. Manami noqanatsukawä, sinöqa Jesucristumi noqacho kawan. Tsaymi Tayta Diospa Tsurinman yarakur kawaykä. Paymi kuyamashpantisi noqantsi rayku wanurqan.

Äru: Dios munashqanno kawashun

Tayta Diosman yarakuq runaqa pay munashqannömi kawan.

Jesucristuta chaskikushqa karqa paypa makinchönami kaykantsi. Tsaymi yarpachakuntsi ima rurashqantsipis, parlashqantsipis y yarpashqantsipis pay munashqanno kananpaq.

Santiago 2.14

Kuyay wawqi panikuna, “Tayta Diosmanmi yarakuykä” nirpis pay munashqanno mana kawaptintsiqua ¿imapaqtaq yarakushqantsipis välin? Tsayno kawaq runakunataqa Tayta Dios manami salvanqatsü.

Chusku räyukuna

Ruëdacho räyü mana kaptinqa ëji mayjina jirururpis manami ruëdata tumatsintsu. Tayta Diosman yarakuq runa cäsukur kawananaq chuskumi räyukuna kaykan.

- Ishkay räyumi kaykan Tayta Dioswan kwanantsipaq.
- Ishkay räyunami kaykan runa mayintsiwan kwanantsipaq.

Räyü 1: Palabranta yachakushun

Tayta Diosman yarakuq runaqa paypa palabranti yachakun.

Tayta Diosmi palabrancho tantiyatsimantsi pay pi kashqanta y imano kwanantsipaq kashqanta. Tsaymi palabrancho mana yachakur mana musyantsitsu imano payta cäsukunantsipaq kashqanta.

2 Timoteo 3.16

Tayta Diospa palabrancho lapan qelqaraykaqkunaqa Tayta Diospa yarpayninkunami kaykan. Tsaymi ali kaykan yachatsinantsipaq, tantiyatsinantsipaq, corriginantsipaq y Tayta Dios munashqanno kwanantsipaq.

Räyü 2: Tayta Diosta manakushun

Tayta Diosman yarakuq runaqa paytami manakun.

Tayta Diosta manakurmi imata yarpashqantsitapis wilapantsi. Tsaynöpis alabantsi, perdonta manakuntsi, agradëcikutisi y wakintapis yanapanpaq ruwakuntsi.

Efesios 6.18

Imay hörapis Espiritu Santu tantiyatsishushqaykino Tayta Diosta manakäriy. Mana ajayaypa imaypis ruwakäriy. Yarakuq mayikikunapaq mana qonqaypa manakäriy.

Filipenses 4.6–7

Imapaqpis ama lakikäriytsu. Tsaypa trukanaqa Tayta Diosta agradëcikir lapanchöpis yanapashunaykipaq manakäriy. Tsayno manakäriptikimi Tayta Dios ali kawayta qoshunki. Paymi shonquykitapis yarpaynikitapis cuidanqa Jesucristuman yarakur mana lakikärinaykipaq. Tsaymi imanir kushishqa kawashqaykita pipis mana tantiyantatsü.



Räyü 3: Juntakëshun

Tayta Diosman yarakuq runaqa yarakuq mayinkunawanmi juntakan.

Yantata ninapita jorquptintsi upishqanömi noqantsipis yarakuq mayintsikunawan mana juntakar qasakashqano rikakuntsi. Juntakarmi itsanqa shumaq yarakunantsipaq shakyätsinakuntsi.

Hebreos 10.24–25

Kuyanakunantsipaq y alikunata ruranantsipaq juknintsi juknintsi shakyätsinakushun. Wakin wawqi panikuna juntakayta qelanaptinpis noqantsiqua ama qelanashuntsu. Jesucristo kutimunanpaqna kashqanta musyaykarqa shakyätsinakunantsipaq imaypis juntakëshun.

Räyü 4: Wilakushun

Tayta Diosman yarakuq runaqa Diospa wilakuyninta runa mayinta wilapanmi.

Tayta Diosman yarakurqa runa mayintsita wilapantsi paykunapis Jesucristuta chaskikunapaq. Chaskikur kushikuptin noqantsipis kushikuntsi y Tayta Diosman masmi yarakuntsi.

Romanos 1.16a

Noqa manami penqakütsu Tayta Diospa ali wilakuyninta wilakur. Tsay wilakuyqa Tayta Diospa podeminmi kaykan lapan chaskikuqkunata salvanapaq.